

EUSKARA. Osakidetzako lan eskaintza ez du onartuko Batasunak, «1.700 iruzur gehiagoko deialdia» delako

Biziberritze Plana «inposatzailea» dela salatu du Batasunak

Erakundeen lana eta gizarte eragileena osagarri izateko premia azpimarratu du

Ekaitz Sirbent | **DONOSTIA**

Batasunak atzo Donostian eginitako agerraldian Biziberritze Plana «inposatzailea» dela salatu zuen, eta Tolosaldean Kontseiluaren eta Eusko Jaurlaritzaren plangintzen arteko bateragarritasuna bilatu duten udalek izan dituzten oztopoen berri eman zuen. *Egunero*-ri, AEKri eta ikastolari ukatutako diru laguntzak aipatu zituzten horren adibidetzat.

Autogobernuaren eztabaida puri-purian dagoen berean, Batasunak azken 20 urteetako hizkuntza politikaren azterketa egin zuen atzo. Indarrean dagoen hizkuntza politika ahitutzat eman ondoren, Batasunak «Euskal Herri osoarentzat eta baita EAerentzat ere» beste hizkuntza politika baten beharra azpimarratu zuen. Biziberritze Plana aipatuz, normalizazioa ez dela erakundeen lanaren ondorioz «soilik» eto-

rriko azaldu zuen. Alde horretatik, «gizarte eragileen elkarlarenaren uztarketa» ezinbestekoa dela adierazi zuten.

Anjel Mari Elkano eta Joseba Alvarez mahai nazionalako kideen aburuz, autogobernuaren balantzeaz eta ordenamendu zein proposamen berriez hitz egiten ari denean, «ondorioetako bat izan beharko litzateke Euskal Herri osoari begira eta EAeri begira zer hizkuntza politika berri jartzen den martxan». Batasunaren iritziz, Ibarretxek berriro ere «bizkar eman die» euskaldunei, eta autogobernua «ongizatearen sinonimotzat» jotzen duenean ez du «aintzat hartzen modu berean herritarren berdintasunezko trataera».

Osakidetzako «iruzurra»

Hori argitzeko, Osakidetzak egin duen lan eskaintza publikoa salatu zuten. Izan ere, 1.700 lanpostu berrietarako



JON URBE / ARGAZKI PRESS

Joseba Alvarez eta Angel Mari Elkano, Batasuneko mahaikideak, atzoko agerraldian.

deialdia egin berri du Osakidetzak, eta lan eskaintza horretan euskara «meritua» besterik ez dela salatu zuen alderdi abertzaleak. Elkanoren iritziz, osasun arloan gertatzen ari dena «iraingarria» da. Baieztapen hori egiteko justiziaren egoera jarri zuen alderagai, baina eremu horretako eskuduntzak Gasteizko administrazioaren esku ez daudela gogorarazi zuen. Horregatik, «20 urtez eginiko iruzurraren iruzurra delako» eta Osakidetzaren deialdia «1.700 iruzur gehiagoko deialdia» delako, Batasunak ez duela onartuko lan eskaintza adierazi zuen.

DONOSTIAKO BATASUNA

Epai batek arrazoia eman dio

Donostiako Batasuna udal taldeak jakinarazi duenez, duela lau urte Udal Gobernuak erabakitako izendapen bat errekurritu ondoren, arrazoia eman dio epaiak alderdi abertzaleari. 1998an Donostiako Udal Gobernuak zirkulazio arloko funtzionario interino lanposturako pertsona bat izendatu behar zuen. Lanpostuak zituen eskaeren artean, 3. hizkuntza eskakizuna edukitzea eta derrigorrezko euskararen ezagutza maila hori egiaztatua izatea beharrezkoak ziren. Udalak lanpostu horretarako 1991n osatutako lan poltsara jo zuen eta, bertan hizkuntza eskakizuna inork betetzen ez zuenez, egokitzen erabaki zen hizkuntza eskakizunik ez zuen pertsona bat izendatzea. Batasunak bere garaian errekurritu egin zuen eta epaiak orain izendapena deuseztatu egin du.

EUSKARA. Euskara planentzako diru laguntzak atzo onartu ziren, Gobernu Batzordearen bileran

Enpresetan euskara indarberritzeko, 661.282 euro bideratuko ditu Eusko Jaurlaritzak

Edurne Unzueta | **GASTEIZ**

Atzoko Gobernu Batzordearen bileran onartutakoaren arabera, euskara planak abian jarri edo garatu nahi dituzten enpresei diru laguntzak eskainiko dizkie Eusko Jaurlaritzak. Hala, hainbat enpresatara bideratuko den 661.282 euroko diru saila onartu zuen, euskararen egoera areagotu eta normalizatzeko asmoz. Eusko Jaurlaritzako Kultura Sailaren proposamenez onartu zen euskara planak garatzeko egitasmoa, eta Josu Jon Imaz Gobernuako bozeramaileak eman zuen erabakiaren berri.

Imazen arabera, ELAY, Ikerlan, CAF eta beste hainbat enpresatan 90eko hamarkadan abian jarritako euskararen egitasmo pilotuen beste aurrera-

pauso bat izango litzateke honako hau. Ordutik hona, garatuz joan dira euskara normalizatzeko planak, eta «eskarmetua, esperientzia eta metodologia egokia metatzeko» balio izan dutela iritzien dio Jaurlaritzak.

Enpresek «euskal gizartearen duten txertatze maila» zenbatekoa den ikusirik, lan mundua hizkuntzaren normalkuntzarako «alor estrategikotzat» jo zuen Imazek. «Enpresa mundua tokian tokiko gizartearen txertatua dago, eta gizartearen helburu eta nahi orokorrekin bat egiten du. Alde horretatik, lan mundua, euskal gizartearen euskararen eta elebitasunaren alde egiten ari den ahaleginaren arlo estrategikoa izateaz gain, lehen mailako tresna ere bada», gaineratu zuen.

Ildo horretatik, gainera, Imazek adierazi zuen Jaurlaritzaren Euskara Biziberritzeko Plan Nagusiak ere bere baitan jasotzen duela lan munduak normalizazioan duen garrantzia.

Imazek azaldutakoaren arabera, euskara planak enpresa bakoitzaren ezaugarri eta helburu lorgarrietara egokituak izango lirateke. Halaber, egitasmoek jarraipen emankorra izan dezaten, enpresetako zuzendariaren eta bertako langileen inplikazioa ezinbestekoa dela pentsatzen du Eusko Jaurlaritzak. Gainera, emaitzen inguruko jarraipena ere egingo da.

Euskara beste merkatu batzuetara zabalduz doa

Oraindik euskararentzat berria den alor honetan euskararen

presentzia handitzen ari da. Azken urteetan, esaterako, plan hauek diseinatzen eta garatzen dituzten prestakuntza eta giza baliabideen zerbitzu enpresak ugaltu egin dira; eta lortutako esperientzia areagotzeko asmoa dago atzo onartutako laguntzekin.

Nolanahi, euskal enpresak sustatzea beharrezkoa izango da egitasmoen helburuak lortzeko, Imazek zehaztu zuenez.

Atzoko Gobernu Batzordearen bileran onartutako egitasmoak Hizkuntza Politikarako Sailburuordetzak kudeatzen ditu, enpresekin izenpetzen dituen banan banako hitzarmenen bitartez.

Eusko Jaurlaritzak azaldu zuenez, Hizkuntza Politikako Sailburuordetzak baliabideak indartzeko eta euskara planen inguruko gaiak aztertzeko, koordinatzeko eta sustatzeko zerbitzua sortu du.

Errenteriako Udala

IRAGARKIA

XEDEA:
«Fanderiako Errotan taberna-jatetxea eta bestelako gauza osagarriak» negoziatutako prozedura bidez kontratatzea.

BALDINTZA EKONOMIKOAK:

LEHEN EZARTZE GASTUAK:
Esleipendunak kontzeptu honetatik ondoko diru-kopuruak jasoko ditu:
- Kontratua sinatzerakoan: **42.070,85 euro.**

- Jarduera abian ipintzerakoan: **48.080,97 euro.**

KANONA:

Esleipendunak Udalar urtean ordaindu beharrekoak bi atal izango ditu: finkoa eta aldakorra. Ordainketa hori bigarren urteik aurrera egingo da, eta beraz, lehenengo urtean ez du ezer ordaindu beharko.

- Kopuru finkoa:
Urteko 3.005,06 €, gehi BEZA.
- Kopuru aldakorra:
Jasandako BEZren %2a.

DOKUMENTAZIOA:

Lehiaketan parte hartzeko **Baldintza-pleguak** Kontratazio eta Ondare Sailan jaso daitezke (Errenteriako Udaletxea, Herriko Plaza 2/g)

ESKAITZAK AURKEZTEKO EPEA ETA LEKUA:

Eskaintzak Udaletxeko Erregistro Orokorrean aurkeztuko dira.

Errenterian, 2002ko uztailearen 8an, UDAL KONTRATAZIO ETA ONDARE SAILEKO ARDURADUNA.
Stua.: Tomás Martín.